



D. O. M.
T H E S E S
 ANATOMICO-CHIRURGICÆ

DE EXOMPHALO.



HERNIÆ quæ fiunt in ipsomet umbilico vel partibus umbilico vicinis, communi Exomphalos vel Omphaloces nomine insigniuntur. Variæ sunt pro variis partibus ex quibus constant. Quæ enim ex intestinis fiunt Enteromphalos, quæ ex omento Epiploomphalos, quæ tandem intestinis & omento simul componuntur, Entero - Epiploomphalos appellantur. Præterea magnitudine, figurâ, simplicitate & compositione, vetustate, &c. non parùm inter se differunt. Infantes Exomphalo sæpiùs laborare (a) observantur.

(a) Morbus ille in recens natis maximam attentionem meretur. Cum enim tumor umbilicalis funiculi principium occupet, sæpiùsque minor sit & oblongus, fieri posset, ut prolapsæ partes injectâ ligaturâ constringerentur. Hujus modi exemplum cum Reg. Chir. Acad. jam pridem communicatum fuisse certò novimus.

Huic autem morbo in illis producendo favent, tum nativa umbilici laxitas, tum perpetui fere clamores, tum denique assiduus illorum decubitus. Viscera enim musculorum abdominalium actione compressa, proprioque pondere in umbilici foramen arietantia, illud sensim sine sensu dilatant & expandunt, viamque sibi inter ipsas aperiunt. Omphaloces mulieribus quoque, præsertim prægnantibus, nec-non viris corpulentioribus & obesioribus frequentior est, ob summam abdominis in utrisque distentionem. (a) Exomphalos causæ remotæ sunt vel proximæ. Remotæ ea sunt omnia quæ foramen umbilici mediamque lineæ albæ partem laxant, distendunt & extenuant; continuus videlicet pinguium alimentorum usus, hydrops, graviditas, &c. Proximæ verò dicuntur illa quæ abdominis cavum coarctantia, viscera quâquâ versum premunt, & foras expellunt; cuius generis sunt ictus, lapsus, nixus, equitatio, tussis, instrumentorum pneumaticorum usus, vociferatio, cantus, &c.

Diversam pro re natâ diagnosim Exomphalos exhibet. Cum enim fit ex intestini procidentia, tumor adest in umbilico, cutis colorem non immutans, cuius basis apice tenuior est, qui tangenti digito renititur, respiratione diutius contenta crescit, propulsus fugit, sponte ut plurimum desidit, & interdum sonat. Cum verò ex omenti prolapsu enascitur, latiorrem exhibet basim, mollior est & inæqualis lentius fugit, & absque murmure retrogreditur. Entero-Epiploophalos signa mixta sunt. Certius autem cognoscitur ex eo quod propulsus, non omnis unâ vice fugiat, sed priora recedant intestina cum sonitu, posterius verò recedat omentum, nullumque sonum edat.

Dignosci quoque potest an viscera per proprium umbilici foramen, an verò per alium locum eruperint. Si enim per umbilicum egressæ fuerint, umbilici nodus in mediâ nec-non dextrâ tumoris parte (b) propè basim occurrit, sin minus incertus illius situs est. Hæc autem diagnosi eò majoris est momenti, quod nisi vetus fuerit, vel paululum increverit, saccus

(a) Umbilici foramen rotundum est, atque fibris aponevroticis ab omnibus abdominis musculis, in illud veluti in centrum commune concurrentibus componi videtur; illius ergo dilatatio summam abdominis distentionem sequatur necesse est.

(b) Peculiaris umbilicalis nodi situs in illâ Omphaloces specie, à vasorum umbilicalium dispositione repetendus est. Cum enim vena umbilicalis à dextrâ parte descendat, arteriæ verò dextrorsum & sinistrorsum ab umbilico ascendunt, sequitur umbilici nodum, ab umbilicali venâ dextrâque simul arteriâ dextrorsum attrahendum esse, dum è contrâ solâ arteriâ umbilicali sinistrâ sinistrorsum attrahitur.

hernialis in priori casu tenuis admodum, (a) vel nullus deprehendatur, in posteriori verò semper adsit, crassiorque cæteris paribus observetur (b). Omphaloces herniæ species est quæ nec molestior alterâ, nec periculosior; nisi enim assiduo bracherii usu contineatur, incarcerationi quam maximè obnoxia est. Hæc verò in Enteromphalo nec-non in Entero-Epiploomphalo quàm maximè pertimescenda, in Epiploomphalo minùs periculosa est. Fit quoque rariùs in illis Exomphalos speciebus quæ pedetentim increverunt, atque maximam umbilici dilatationem supponunt. Denique Omphaloces radicalem in infantibus, palliativam verò in adultis & senibus curationem admittit.

In eo consistit omphaloces curatio, ut prolapsæ partes in abdomen reponantur, atque in situ suo contineantur. Partium repositio seu taxis celebrari non potest, quin æger idoneò in situ collocetur. Supinus ergo recumbere debet cruribus capiteque paululùm elevatis, clunibusque & pectore lumbis elatioribus, ut nempe muscoli abdominales quàm maximè relaxentur, parque ventris infimi ex umbilici regione posita cæteris depressior sit. Tùm Chirurgus partes alterâ manu leniter comprimit, deindeque in abdomen lentius repellit, dùm alterâ tumoris basi appositâ impedit ne denuò relabantur. At verò quando maxima est prolapsarum partium quantitas, aut sibi met ipsis, vel vicinis sacci parietibus in Exomphalo veteri coherens, ab omni repositione abstinendum: illam enim impossibilem esse patet. Difficillimè quoque succedit, cùm partes annulo fortius constringuntur, & ut ita dicam, incarcerationantur. In illo autem casu ad venæ sectionem plus minùs reperitam, & ad lypothimiam quâlibet vice protractam, fomentaque & cataplasmata emollientia confugiendum esse suadet inflammatoria partium dispositio (c).

Partes diversis mediis in situ suo retineri possunt; in infantibus, exempli gratiâ, sufficit globulus è medicamento quo-

(a) Peritonæum in Omphalocèle quandoque ruptum reperiri variè comprobant Dionisii, Platneri, Scharpii, D. de la Faye Observationes. Dionisius qui saccum hernialem semper desiderari asserit, illius defectum ex eo deducit quod umbilicus nihil aliud sit quàm nodosa vasorum umbilicalium extremitas, quæ cicatrici quàm simillima relaxari nequeat. Verùm nullus est qui non videat rationem illam nullius esse momenti, cùm umbilicalia vasa extra peritonæum occurrant.

(b) Illa sacci crassities pendet à fibris lineæ albæ summè extenuatis. Quæ enim herniæ in partibus umbilico vicinis enascuntur, illarum rupturam non supponunt.

(c) Si partium repositio mediis recensitis obtineri nequeat, operatio celebranda est. Hæc autem diversâ ratione pro variis circumstantiis instituitur, ut videre est ex thesi de Herniâ incarcerationatâ, non ita pridem hisce in scholis propugnata.

dam adstringente paratus & umbilico apponendus; deindeque emplastro, splenio quadrato, nec-non fasciâ circumductâ continendus. Cum verò morbus invaluit, lamina plumbea splenio immititur, ut melius reprimat. In adultis & senibus cingulus ad id accommodatus peculiarique scuto sive laminâ nec-non pilâ instructus adhibetur. Melius autem succedit si duabus habenis super humeros imponendis huicque anteriori & posteriori suendis instruatur. Quandoque etiam in obesioribus alia necessaria est fascia quæ per perinæum descendens, juxta anteriorem abdominis partem ascendere, cinguloque alligari valeat.

Fasciæ prædictæ præstat machina scuto instructa atque è circulo ferreo bracheriorum modo composita. Dùm enim cinguli pila partes continet, umbilici foramen occupat, illiusque contractionem impedit; contra verò bracherii scutum umbilico appositum, nec illud ingreditur, nec illius contractioni obstat. Huic machinæ rursus anteposenda videtur nova bracherii elastici species à D. Suret inventa, & in Acad. Reg. Chirurg. Comment. T. II. descripta. Illius enim lora distenta spontè contrahi nequeunt, quin alternis abdominis motibus obsequatur, suppositas partes eadem vi comprimat, visceraque prolapsura certius contineat.

Denique cum maxima est partium quantitas, aut vicinis coherent partibus, suspensorio vel bracherio cujus scutum concavum sit, utendum est; scuti deinde cavitas vel suspensorium eâ proportionem minuuntur, quâ decrescit herniâ, sicque perfecta illius repositio sæpius obtinetur.

Has Theses, DEO DUCE, & Præside M. RAPHAELE BENEVENTO SABATIER, Liberalium Artium & Chirurgiæ Magistro, nec-non Regiæ Chirurgiæ Academiæ Socio, tueri conabitur FRANCISCUS PIPELET, Cociacus Laudunensis, Liberalium Artium Magister.

*Didacus
DeLaca*

P A R I S I I S,
IN REGIIS CHIRURGORUM SCHOLIS.

Die Sabbati 31^a. Decembris anno salutis 1757, à sesquisecondâ post meridiem ad septimam.

PRO ACTU PUBLICO.
ET MAGISTERII LAUREA.

Typis Viduæ DELAGUETTE, Collegii & Academiæ Regiæ Chirurgiæ Typographi, viâ San-Jacobæ, sub signo Olivæ.